


詩女史

十三之四
拾遺一之三



漢書門				
一	一	一	一	一
八	一	一	一	一
四	三	〇	一	類
冊	架	函	號	

內閣文庫				
六	一	一	一	漢
函	一	一	一	書
九	四	一	一	
架	冊	號	類	

內閣文庫			
番號	漢	11111	
冊數	4 (4)		
函號	363	73	



淺草文庫

詩女史

第十三卷

錢塘田藝衡撰

鐵氏二女

鐵氏色目人父鉉為山東布政使靖難師攻城百計
 終不能下 文皇入正大統擒鉉至殺之其家屬發
 教坊司為樂婦二女入司數月終不受辱有鉉問官
 至二女各獻以詩長女詩曰教坊脂粉洗鉛華一片
 閒心對落花舊曲聽來猶有恨故園歸去已無家雲
 鬟半挽臨粧鏡雨淚空流濕絳紗今日相逢白司馬
 尊前重與訴琵琶次女詩曰骨肉相殘產業荒一身

詩女史



何忍去歸倡淚垂玉筋辭官舍步蹴金蓮入教坊覽
鏡自憐傾國色向人休學倚門粧春來雨露寬如海
嫁得劉郎勝阮郎問官以詩上達文皇曰彼終
不屈乎乃赦出之皆適士人以終老焉

宋氏

宋氏金華人宋學士景濂之族也嫁衢州一七子登
進士第除閬州守以他累竟死獄中母妻編成金齒
衛途中作歌題于郵亭壁云郵亭咫尺堪投宿手握
親姑憇茅屋抱薪就地旋鋪攤支願相向吞聲哭旁
人問我是何方俛首哀哀訴衷曲妾家祖居金華府

海道曾爲上千戶舉艘運粟太都回金牌勅賜雙飛
虎兄弟晦跡隱山林甘學崇文不崇武今朝玉堂宋
學士亦與妾家同一譜笄年嫁向衢州城夫壻好學
明詩經離騷子史徧搜攬志欲出仕甦蒼生前春郡
邑忽交辟辭親千里趨神京丹墀對策中殿舉馳書
歸報泥金名承恩拜除閬州守飄然画舫西南行到
官未幾訪遺老要把奸頑盡除掃日則升堂治公務
夜則挑燈理文藁守廉不使纖塵污執法致遭僚佐
怒府推獲罪苦相攀察院來提有誰訴臨行囊橐無
緇銖惟有舊日將去書城中父老泣相送道旁過者

咸嗟吁一時徵賦動盈萬妾夫自料無從辨經旬苦
打不成招暗囑家人莫送飯嗟乎餓死囹圄中旗軍
原籍來抄封當時指望耀門戶豈期一旦番成空親
隣憐妾貧如洗歛鈔慙勤饋行李伶仃三口到京師
奉旨編軍戍金齒阿弟遠送龍江邊臨歧抱頭哭向
天姊南弟北兩相痛別後再會知何年開船未遠子
病倒求醫問卜皆難保武昌城外野坡前白骨誰憐
葬青草初然有子相依傍身安且不憂家蕩如今子
死姑年高縱到雲南有誰望八月官船渡常德促裝
登途較行色空林日暮鷓鴣啼聲聲斗道行不得上

山險如登天梯百戶發放來取齊雨晴泥滑把姑手
一步一仆身沾泥晚來走向營中宿神思昏昏倦無
力五更睡重起身遲飯鍋未熟旗頭逼翻思昔日深
閨內遠行不出中門外融融日影上欄杆花落庭前
鳥聲碎瑤髻斜簪金鳳翹翠雲蟬鬢蛾眉嬌繡牀新
刺雙蝴蝶坐久尚怯春風饒豈知一旦天亡後萬里
還荒要親走半途日暮姑云飢欲丐奉姑羞舉口回
來一婦天台人情懷薄似秋空雲喪夫未經二十日
画眉重嫁鹽商君血色紅裙綉羅襖終日騎驢涉長
道穩坐不知行路難揚鞭笑指青山小取懽但感新

人心那憶舊夫恩愛深吁嗟風俗日頹敗廢盡大義
貪黃金妾心汪汪淡如水寧受飢寒不受耻幾回欲
墜江魚腹姑存未敢先求死前途姑身少康健辛苦
奉姑終不怨姑亡妾亦隨姑亡地下何慚見夫回說
罷傷心淚如雨咽咽垂頭不成語路傍過者為酸心
隔嶺孤猿叫何許

郭愛

郭愛字善理鳳陽人也穎悟警敏尤極巧慧 宣宗
皇帝聞其賢命迎至京既至病遂不起先數日自知
死期書楚聲以自哀其詞曰修短有數兮不足較也

生而如夢兮死則覺也先吾親而歸兮獨慙乎
孝也心悽悽而不能已兮是則可悼也

沈氏

沈氏湖州人聰慧善屬文少選入宮為給事中 孝
皇時嘗試六宮守宮論沈文最佳其發端云甚矣秦
之無道也宮豈必守哉上悅擢為第一第溥為貢士
就試春官沈贈以詩云白少離家侍禁闈人間天上
兩依稀朝迎鳳輦趨青瑣夕捧鸞書入紫微銀燭燒
殘空有淚玉釵敲斷竟無歸年來望爾登金籍同補
華蟲上衮衣

一作早沐恩光入帝畿恨無寸草答春
暉又華蟲作山龍

孟淑卿

孟淑卿蘇州人訓導澄之女有才辨工詩自以配不得志號荆山居士嘗論宋朱淑真詩曰作詩貴脫胎化質僧詩無香火氣乃佳鉛粉亦然朱生故有俗病李易安可與語耳爲士林所賞

悼亡詩云斑斑羅袖濕啼痕深恨無香使返菟荳蔻花存人不見一簾明月伴黃昏

春歸云落盡棠梨水拍堤萋萋芳草望中迷無情最是枝頭鳥不啻人愁只管啼

長信秋詞云君意一如秋節序不教芳草日長春

朱氏

朱氏福建人禮部員外郎林鴻妻年十九卒子羽終身不娶夫妻皆能詩朱氏勉子羽詩云玉食叨陪近尚方五雲深處列鸚行經綸輔國從人仰竹帛流芳與世長待漏衣沾仙掌露朝天身惹御爐香功名遂歸寧日一榻清風綠野堂

茅氏

茅氏太倉陸宸母也蚤年寡居其賣廢宅詩云壁有蒼苔甑有塵家園一日屬西鄰傷心怕見門前柳明日猶如陌路人

林氏

林氏福建人晚春遣興云拋卻銀鍼到小庭遣情無
柰獨傷情高低別院秋千影遠近人家笑語聲黃鳥
曉寒藏翠柳綠苔春盡點紅英一年好景仍孤負堪
嘆嫦娥老此生

陳德懿

德懿姓陳氏仁和人都御史李公昂妻也父敏政南
康知府簪纓奕世而陳氏尤長于詩其所居遊交際
輒見之吟咏挺傑閩閩斯固已足多矣而况迺并包
徃典兼諳鍊事馳志塵埃之外不亦尤大奇婦人哉

晚歲彌精著作甚富惜其孫子不習珠璣散軼為口
慨也近有蔣子獲遺稿于敗簾中輯而成編分為四
卷余生去夫人未甚遠嘗聞故長老言夫人以文學
代女紅能以餘力訓其弟府尹君良器及其子道州
君士魁卒以成立又言與夫人同時者有海寧朱氏
往來倡酬庶幾力敵而朱氏之作傳播已藉夫人顧
闕然久湮豈婦人之名亦有幸不幸哉

春草云無人種春草隨意發芳叢綠遍郊原外青回
遠近中罩煙粘落絮和雨襯殘紅不解王孫去凄凄
對晚風

舟行云夜過平望驛孤舟涉曉行雲迷張翰宅煙障
闔閭城纜引崑花落帆張溪鳥迎要識吳中趣須聽
欸乃聲

夏日偶成云庭竹綠交加虛窗罩碧紗盆栽金線草
臺長玉簪花雨過留殘日雲歸帶晚霞未能消暑悶
閒步聽池蛙

至淮陰云淮河西畔泊行舟引蓼汀花對客愁帆影
遠隨波影滅櫓聲低逐浪聲流雲橫遠岫千林晚雨
過長堤兩岬秋最是煙波好風景白蘋深處浴輕鷗
高郵云蕭蕭蘆葦沒長堤野色秋光總入題木落山

空雲影薄天高水闊浪痕齊商船泊岬牙檣密旅館
招人酒旆低一片孤帆隨鳥沒又聞柔櫓夕陽西
春日云恰恰流鶯轉樹梢融融春色遍江臯池塘弄
碧鋪輕絮庭院飛紅謝小桃日午堂前人語寂雨晴
堤上燕群高新詩每欲追風雅檢閱篇章論楚騷
秋興云小塘蒲柳漸凋疎露滴銀牀下井梧隱去陶
潛戀松菊歸來張翰憶葦鱸雨收殘暑蟬聲咽風送
新涼鴈影孤每爲悲秋減懷抱任他香冷博山爐
又云江上浮雲障碧空亂山愁鎖夕陽紅邊城畫角
吹殘日野寺疎鐘度曉風梧樹着霜飄敗葉菊花經

雨發寒叢愁多倦寫蠅頭字坐倚胡牀看塞鴻
秋夜云霜染楓林幾樹紅碧天雲散月如弓十年遊
覽江湖外一枕逍遙夢寐中到處山河多禹跡滿城
冠服有唐風愁懷清思難道遣四壁啾啾聒夜蟲
舊行閩山見居人以竹引泉云行盡山蹊路渺茫幾
家茅屋對斜陽引泉竹溜穿厨入墮粉松花遶舍香
樵徑無人閒卧犢石田有雨漸分秧平生頗有山林
癖欲向溪邊結草堂

別同寅常夫人云搖搖征旆動離情欲去還留未忍
行雨過汴梁農事足潮歸江右客帆輕關山跋涉難

爲別道路驅馳不記程後會無由託魚鴈相看惟仗
酒頻傾

睡起云旭日暉暉上梳屏芙蓉衾暖夢初醒銀鈎半
捲鮫綃帳玉醴新傾琥珀瓶梅樹結胎微露紫竹枝
含影尚餘青凍蠅無力飛還墮又掛蛛絲入短檣
遣興云花霧霏霏壓畫闌綺窗贏得一春閒曉粧試
欲尋芳去晚醉應須帶酒還梨萼已舒蝴蝶粉筍尖
初試玳瑁斑朱門盡日無人閉海燕歸來不上關
暮春云小庭槐影漸成陰池館無人院宇深簾捲蝦
鬚人寂寂香焚鵲尾晝沉沉海棠笑日嬌常困楊柳

搖風瘦不禁薄暮畫闌人散後落花滿地碧苔侵
和彥成弟韻云詩句裁成興有餘緘封問我近何如
形容每向愁中變書信常於別後踈故里幾年煩筆
硯名邦今日擁旌旗慈闈侍養須三釜忠孝家傳莫
負初

贈五臺尼僧雲秀峰云貝葉翻經下五臺倏然飛錫
到天台鉢分甘露沾三界手散曇花遍九垓機事忘
時心地豁真空悟後性田開何當得遂叅禪約不二
門中任往來

贈于府尹女張夫人云節婦忠臣自一家即今人物

復誰誇高標已有三從德雅志先成九轉砂湛湛壺
天閒日月離離庭草帶煙霞幾回欲問長生訣闔苑
瑤臺道路賒

秋夕云水滴銅壺夜漏停樓頭月午睡初醒丹爐養
藥重添火小閣焚香再禮星撼撼風聲敲木葉輝輝
燈影照帟屏擁衾忽爾成竒夢直駕長鯨過洞庭
靜庵許來訪竟不見過作此以寄云靜庵曾約來相
訪底事雲軒竟不過深院雪消芳草綠小園風過落
梅多欲餐白石先投藥愛寫黃庭不換鵝我欲共君
修大道他年銅狄再摩挲

書懷云遊宦江湖已有年歸來晦跡愛林泉自知學
道疎人事每爲搜詩戒夜眠開戶欲尋芳草地捲簾
愁對落花天肯將俗事縈懷抱須向山中作隱仙
雜興云太極由來不可名內觀須向道中醒陰陽未
判皆無像天地絕分便有形胡馬固應嘶北地鯤鵬
多是化南溟也知盡性能窮物靜學希夷百慮停
書懷云五十年來鬢已華只將修煉作生涯丹書細
閱求傳道爐竈時封學養砂服食未諧雲母粉幽棲
多種石楠花間來想像陶弘景高拱樓居遠俗譁
哭夫云將相功名四十年豈期一別隔重泉文章自

合今時範政績堪爲後世傳對鏡每傷鸞影隻傳家
須得鳳毛賢淒風苦雨寒燈下幾度哀思淚慘然

朱氏

朱氏號靜庵海寧周教諭濟之妻也父祚尚寶卿兄
種太僕丞朱幼穎悟得其家學以詩鳴于時多與上
官倡酬甚爲名流所賞年八十餘有集十卷朱嘗讀
李易安詞有云一代才華真可惜錯將閒恨寄新詞
然朱亦以所匹非稱每每形諸吟咏故其離落見梅
有感云可憐不遇知音賞零落殘香對野人斯復情
見乎辭矣

雨中駕懷云茅屋無客過蒼苔滿庭綠誰憐揚子居
寥寥苦幽獨

惜春云桂樹遊絲旖旎撲簾飛絮輕狂杜宇喚將春
去小桃落盡紅香

竹枝詞云西子湖頭賣酒家春風搖蕩酒旗斜行人
沽酒唱歌去踏碎滿階山杏花

又云橫塘秋老藕花殘兩兩吳姬蕩槳還驚起鴛鴦
不成浴翩翩飛過白蘋灘

暮春即事云落花如雪點蒼苔深掩重門晝不開蝴
蝶不知春已去又隨飛絮過墻來

初夏云落盡殘紅日正遲薰風一夜拆薔薇池塘雨
過無人到滿地榆錢鶯亂啼

病中作云別盡寒燈夢不成擁衾危坐到三更不知
何處吹羌笛落盡梅花月滿城

客中即事云華屋沉沉乳燕飛綠楊深處轉黃鸝疎
簾不卷薰風靜坐看庭花日影移

秋日見蝶云江空木落鴈聲悲霜染丹楓百草萎
蝶不知身是夢又隨秋色上寒枝

閨怨云啼鳥驚回曉夢醒起來無力倚幃屏娥眉未
得張郎畫羞見東風柳眼青

養蠶詞云桃花落盡日初長陌上雨晴葉黃拜罷
三姑祭蠶室漸籠温火暖蠶房

又云交交戴勝屋頭鳴來柘青青鳥已生女兒守箔
夜無寐切葉喂蠶天欲明

染甲云金盆和露搗晴霞紅透纖纖玉筍芽翠袖籠
香理瑤瑟綠陰新綻海榴花

平望舟中即事云獨坐蓬窓下挑燈話別離旋沽平
望酒細咏破川詩遠寺鐘聲動孤村月上遲含愁緘
尺素慰我北堂思

客中偶成云異鄉久爲客風雨阻歸程兩岬數峰碧

孤舟一羽輕蓬窓殘燭在煙樹早鴉鳴坐待東方曙
依稀見海城

春雨云濕雲漠漠雨如絲花滿西園蝶未知金屋曉
寒鶯語澁畫樓春晚燕歸遲宮桃有恨啼紅淚煙柳
多情歛翠眉檀板金尊久寥落孤城愁聽角聲悲
湖曲云湖光山色映柴扉茅屋踈籬客到稀間摘松
花釀春酒旋裁荷葉製秋衣紅分夜火明書屋綠漲
晴波沒釣磯惟有溪頭雙白鳥朝朝相對亦忘機
夜坐云吳蠶初出夜無眠數就更籌覺暮寒柳色弄
陰春已暝角聲吹月夜將闌金爐火冷沉煙細羅幌

風生蠟炬殘獨坐空庭望銀漢碧天如水露溥溥
秋夜云月轉梧桐夜未央繡屏斜裊篆烟香金風初
起桂花落玉漏無聲秋夜長碧漢望窮仙路遠紫簫
聲徹晚天涼乘槎欲共天孫會惆悵銀河路渺茫
荅李都憲云獨坐空堂玉漏遲故人何處不相知
聲依井夜將半花影橫窗月上時促席每聆高世論
挑燈重看寄來詩恨無羽翼飛騰去幾度臨風動客
思

白苧詞云西風肅肅天雨霜館娃宮深更漏長銀臺
絳蠟何煌煌笙歌勸飲催華觴美人起舞雪滿堂清

歌宛轉飛雕梁君王沉醉樂未央臺前月落天蒼蒼
春睡詞云茸茸芳草含新綠露井天桃錦雲簇西闌
干外早鶯啼又喚春光到華屋綺窓花影搖玲瓏玉
人夢破春溶溶雲鬟半髻鳳釵滑枕痕一縷消輕紅
香汗微微透衾濕含情欲起嬌無力海棠庭院鳥聲
和睡足東風一竿日

雙鶴賦云惟仙禽之高潔稟玉雪之貞姿翔崑崙之
琪樹啄玄圃之靈芝共遨遊于碧落同沐浴于天池
與鸞鳳而爲侶矧燕雀之敢窺何虞人之見獲遂籠
獻于軒墀蒙主人之過愛聊隱跡而棲遲故其呼之

則應撫之即馴山鷄雜處野鷺爲倫志昂藏而獨立
情偃蹇而弗伸若夫春雨初晴花陰滿庭臨風振羽
向日梳翎或翩躚而對舞或天矯而同行望故巢之
修阻徒奮迅而長鳴旣而白露初降金風始高丹頂
欲潔玄裳飄蕭發清唳于永夜徹遺響于九臯感遊
子之躑躅使遷客之無聊爾乃安于棲息飲啄適宜
受乘軒之寵渥釋籠檻之羈縻愧微軀之匪薄承眷
顧之恩私感厚德猶未報徒馳情而在茲永克君之
翫好誓畢世而不違

虞氏

虞氏海寧人董涓妻也少慧知書頗善吟咏年十六
歸董甫兩月而涓卒痛絕欲死以殉家衆防之遂不
得死于是刻木爲夫像而晨昏事之年五十餘卒人
稱節婦云
咏菊云移得春苗愛護周柴桑無主爲誰秋寒芳甘
抱枯枝萎羞墜西風逐水流
井上竹云一片貞心古井泉清寒徹骨自堪憐相看
歲暮青青色歷盡冰霜戴一天

沈氏

沈氏吳江士族女也閨情詩云金鍼刺破窓檯紙引

得梅花一線香
螻蟻也知春色好
倒拖花瓣上雕墻

江西婦女

一葉芭蕉詩云何處移來一葉青
似同羅扇鬪輕盈
今宵風雨重門靜
減却蕭蕭幾點聲

邵氏

邵氏仁和人答情人云歲暮蕭蕭雨雪多
寒威入戶墮金梭
忽聞青鳥傳消息
爲問佳期更若何

淮安妓

淮安一妓送一舉子上春官云淮草青青淮水渾
安排樓櫓送王孫
明年三月桃花發
君聽傳臚妾倚門

婁妃

婁妃者寧庶人宸濠妃也才而賢從游郊外攬轡口
占云乘春並馬出東郊
帶得詩來馬上敲
着意尋春春不見
東風吹上海棠梢
庶人陰謀不軌妃嘗極力
諫之卒不聽鄱陽之敗妃赴水死

翠妃

翠妃亦宸濠宮人宸濠有二寵姬曰翠妃曰素妃其
翠妃則宮室服飾器用皆翠其素妃則宮室服飾器
用皆素咸俊慧善音律庶人潛蓄叛謀為一御史所
制事幾欲發庶人大懼設宴誘御史醉納翠妃宮中

令之侍寢遂不敢舉及御史代去翠妃思之作詩曰
垂柳依依拂苑牆漢宮離思不勝長管絃聲咽千門
月簾幙寒生萬瓦霜綠綺暗籠雙翡翠錦衾空卧兩
鴛鴦青鸞望斷無消息孤負金盤夜夜香濠敗及難
能曉

吳中尼能曉書情人扇云欲求如意着袈裟到處春
風到處家倦鳥投林難擇木游蜂尋蜜亂穿花青天
一席何須幔濁酒千鍾祇當茶但願輪迴再妍少才
人膝上弄琵琶本土夫女淫而狂故流落云
詩女史卷十三
第十三卷終

詩女史

第十四卷

錢塘田藝衡撰

鄒賽貞

賽貞者太平當塗教授封監察御史鄒公謙之女國
子監監丞贈翰林編脩濮公之妻也少聰慧教授
公訓以列女傳經史速解冥契形諸吟咏隨事摹寫
見者無不竒之以爲是無愧于能言之士矣皆以士
齋稱之因自號曰士齋監丞公方之官卒于道鄒氏
爲文以祭之曰嗚呼哀哉嗚呼痛哉惟我與君蚤爲
夫婦合志同心期大門戶君志四方我聊內助蚤歲

述邈中年雲路發軔曹庠師儒碩傳教法蘇湖清白
亦固養子岐嶷一經蚤附子北父南參商幾度幸兒
京闈天荒一破我君共喜達旦而坐自念平生遭逢
屢蹉衮衮諸公二卽必做歲之丙辰果中甲科玉堂
金馬子壻聯珂君陞東萊京師順過父子壻女團樂
咸和洽然內集綵服婆娑匆匆宦况復爾奔波中州
持衡英才網羅四藩文主公道維多庚申之春應詔
而起寒谷春陽恩例不次父子同朝天倫篤至豈料
季兒殤於此際傷割之悲淚竭心灰猶賴長兒慰我
愁懷盤飧日侍杖屨追陪噫承平頗稔禍蘖將媒君

轉美官南胄繩愆故鄉只尺擬拜墓阡獨嗟父子恩
愛纏綿卜日啓行中秋月圓舟楫而南速抵江滸踐
任弗及背瘡伏虎欲奔家園風波故阻竟後跋前誰
能我顧君猶命我移入官署湯藥親嘗精神無異執
手不言尚冀疾愈禍變不測竟成長逝嗚呼哀哉嗚
呼痛哉君骸我收君柩我撫北都病兒南奔哀苦鞠
樞歸鄉聊遂安妥近郭僧房謹奉香火豈料吾兒尋
亦寢疾茹苦抱痛瞑眩無益晨猶在床暮已在簣嗟
我慟傷五內褫裂嗚呼哀哉天胡不仁而致我於此
極哉二人父子偉偉乎英才堂堂乎竒魂天胡奪之

言女史十四
速而不繼為塵埃耶橋門翰苑官秩不殊而儼乎其
仙境也何夢幻迤邐而不得晝錦於鄉閭也嗚呼哀
哉痛哉我為君婦四十餘載百年之期歲月不待憶
昔清閨八詠有在今逢逆境三從誰賴嗚呼哀哉幸
我壻女遠來治喪爰擇佳城金山之陽仲冬甲申維
哀之良雙旌發軔玉骨斯藏潛德不磨天符共佩父
子並穴泉臺未賁慈孝相憐死生一致嗟我悲哀苦
生人世尚冀我靈陰右俾家不墜俾孫有成善門餘
慶指日復興臨柩俯伏血淚如傾蘋蘩侑奠清酒在
樽靈其不昧鑒此哀忱三獻殯宮未別千春嗚呼哀

哉夫婦儒雅惟以倡和自適當其時子韶已舉進士
仕為編脩得封孺人女曰秀蘭適大學士鉛山費公
宏子壻鼎貴榮極一時未幾盛極而衰晚景頗落寞
耳子充嘗評孺人之作文采絢爛若機錦之初剪意
味雋永若鼎和之既調而其音韻鏗鏘又若襟佩之
交振蓋舉女德婦功之懿而發之於華牋綵翰之間
使其服章逢厠縉紳固宜掉鞅文苑為天下奇男子
而乃深處中閨美不外見胸臆之奇殆有無因而盡
吐者昔歐陽子序謝氏希孟之詩而歎其不幸為女
子莫能章顯於世由孺人觀之豈不信哉乃褒其詩

詩文卷十四
三
文爲四卷名曰士齋詩集且爲之序云

鷺鷥云聯拳屬玉兒飛向磯頭立秋寒雪不消點破

江天碧

丙辰歲在京邸與子女會適遇中秋子在翰林良辰
美景喜集門庭兒女孫枝共娛荆布樂則樂矣然卷
耳之私不無興念因口占二絕并邀吾壻女過舍翫
月云九載中秋宦邸過今年團聚樂偏多晚涼月上
梧桐處共瀉金樽意若何又銀漢無聲夜氣清良辰
忽感宦遊情東山遙望人千里想亦停杯對月明
寄魯弟寧羗官邸云焚鬚常動病邊思一樹荆花本

共枝傳信莫嫌雙鯉遠衡陽秋蚤鴈來時

魯亦舉進士爲御史

奉未軒取笑云趨機曾勉樂羊思霜雪青青連理枝

常憶十年勤苦意寒窗夜雨剪燈時

子充閣老書報賜玉帶云玉帶生花出帝家新恩喜

報下天涯春風門巷知多少昨夜先來上燭花

官邸寄妹安貞云封緘憑雁寄多病尚纏綿寒粟侵

肌玉秋蓬亂鬢蟬鄉書猶未達肉骨自相牽何日歸

寧處燃燈話少年

勉齋兒讀書戒酒云世澤承清白兒郎正少年趨庭

誇克肖窮理貴精研莫飲下坡酒宜撐上水船床頭

無物遺經史是家傳

春日述懷云遲遲日影上簾鉤百種新愁掛念頭午
睡易驚鄉夢遠春暉難報寸心柔芸窗燈火常當夕
鵬路風雲未遇秋身病消容尤可恨菱花照處自堪
羞

韶兒從學舅氏未軒省父南歸予攜幼子女居京邸
作詩寄之云長子南遊數月餘况君別後更躊躇消
容怕覽奩前鏡遺悶閒看架上書侍女斷釐勤和鬻
幼兒拋食厭無魚清貧固可平生意忘卻離愁樂自
如

用簾字韻呈未軒云日過書窓便捲簾鳴爐香燼手
重拈自知蘇氣如春暖更覺清心耐夏炎義理精微
宜苦究世情僥倖也堪嬉笑談莫把工夫廢堂上嚴
親髮雪添

勉訖兒云年少光陰莫自寬詩書因解滿床攤肯將
燕石懷中寶惟喜驪珠掌上看簞食可知顏子樂緼
袍誰笑仲由寒書香一派能相繼贏得時人羨二難
寄靈壽鄭景明妻云從親少日仕嵩陽曾處閨門接
孟光三十餘年成繾綣八旬高壽喜康疆哦松二子
榮天祿戲綵諸孫遶畫堂我亦青氈共華髮陰陰玉

樹煥龍章

子充脩撰書報弄璋次韻云寥落官居喜事繁化生
曾說弄銀盆音傳母子忻無恙祥兆門楣慶有孫英
物已從今日卜雀屏能記舊時恩賓筵樽俎歡娛處
愧我犀錢未入門

京邸九日懷未軒云十年清苦伴青氈喬擢無緣別
思牽楓葉蕭蕭添曉醉菊花朵朵鬪寒妍秋江未見
歸張翰孤館誰隣老鄭虔欲覓白衣充酒使遠傳逸
興到籬邊

何紫雲

紫雲南海人教官何圖之女也送夫之京師云惜春
無計爲春留縱有黃金也拙謀歸鴈盡隨雲北去落
花都付水東流窓含白晝鶯聲老簾捲黃昏燕語愁
此別不須重惆悵明年花發又登樓

范氏

范氏新淦人讀書而早寡居以教授里中見爲業楊
公士竒過村塾偶見几上聯云墨落杯中一片黑雲
浮琥珀梳橫枕上半輪明月照玻璃公問誰所作有
學童對曰家母所書也公大驚異禮見之後公在內
閣上欲選女師因薦之召入禁中者數年一日題

老婦牧牛圖云貴妃空死馬嵬坡出塞昭君怨最多
爭似阿婆牛背穩笛中吹出太平歌 宣廟見之笑
曰彼嫗不樂居此矣遂封為夫人厚遣還鄉

儲氏

儲氏尚書儲擘女也適舉人陳某其小姑嫁時儲戲
贈詩曰天桃灼灼向窓前十二闌干次第看昨夜雨
聲三四點惜花人聽未曾眠

楊夫人

氏者楊修撰慎之夫人也有才情送夫會舉臨岐
賦詩有云羊角秋風搏桂子龍頭春雨潤桃花用修

笑而領之明春果狀元及第及用修戍雲南嘗寄之
詩云鴈飛曾不到衡湘錦字何由寄永昌三春花柳
妾薄命六詔風烟君斷腸曰歸曰歸欲日暮其雨其
雨怨朝陽相聞空有刀環約那得金雞下夜郎又賦
調一闕云積雨釀春寒見繁花樹樹殘泥塗滿眼登
臨倦江流幾灣雲山幾盤天涯極目空腸斷寄書難
無情征鴈飛不到滇南蓋金衣公子也隆慶初放還

王月粧

月粧姓王氏海鹽向升之妻也年十六歸升甫一歲
而升卒王大慟殞地幾絕即設榻極傍朝夕坐卧時

覽鏡嘆曰人言女子頸長者殺三夫吾頸長其可再乎屢欲自縊為姑所止不復茹葷日以針工自給姑憐其少將奪其志號泣欲引斧斷足以誓不再適也嘗作詩云孤燈一盞照空房四壁蛩聲割寸腸休怨淒涼眼前事自燒前世斷頭香乃決意求死至晚伺姑寢遂沐浴更衣復作詩云平生節孝兩無成遺與人間作話名寄語湘君賢姊妹東風回首莫關情擲筆縊于柩側嘉靖十七年十一月五日也僅一十有八升卒時以汗巾遺婦曰汝不忘吾見此即見吾也婦時時把翫既死猶不去手人莫不憐之云

楊文儷

文儷姓楊氏仁和人工部員外郎楊公應獬之女也幼善讀書有才思長于吟咏為餘姚文恪孫公陞之繼室公為禮部尚書楊封夫人相夫教子擅譽三朝足以占令德之有素矣其所著畧附見家集云

月夜彈琴云新秋明月夜卷幔理絲桐素魄千門曉清音一院風落霞飛指下流水瀉絃中倚曲聊閒眎高天度遠鴻

寄龔兒云燕山聽鹿鳴早歲已成名隱霧今棲豹搏風即起鵬言懷遠遊子無那倚閭情欲寄平安字炎

天鴈不征籠蓋先夫人之子登丙辰進士第郎中鄉
寄鋌兒云念汝留京國春花兩度紅讀書丹禁裏試
筆玉堂中才美名應振官貧道不窮百年須自勵清
白舊家風鋌亦先夫人子登癸丑進士第編修侍郎
示鈞兒云又是清和候梅黃細雨天流光人競惜向
學汝須專美質元難恃虛名亦枉然能酬題柱志始
見馬卿賢鈞今名鏘登戊辰進士御史
示鑛兒云汝年亦漸長學問可圖成莫效頑愚子須
齊賢俊名青萍方在匣綠綺未聞聲何待三遷教傳
經有父兄鑛亦登庚午鄉舉

示鑲女云吾女資元淑相隨繡閣前檻花嬌細雨旌
樹藹和煙須讀名媛傳無忘姆教篇芳年易成壯懋
指又鳴蟬

懷親云玉露沾花濕金風透幕涼天連秋水碧山帶
晚煙蒼撫景嗟時序懷親憶故鄉倚闌凝立久心逐
鴈南翔

折楊柳云昔去臨岐路柔黃綴樹生今來歸故里暗
綠與樓平花起輕飄絮條深巧囀鶯因看攀折處記
取別時情

關山月云漢京今夜月萬里照關山秋葉仍看落征

人尚不還寒光凝厚甲孤影對愁顏歡宴高樓者笙
歌正未閒

黃金臺云燕主偏安易水隈千金不惜選良才四方
豪傑今何在八面輿圖尚自開北塞黃雲連朔漠中
天紫氣繞蓬萊聖人馭極恢疆宇誰向瑤京說舊臺
寄妹云浙水春風送別航別來荏苒幾星霜我從文
翰留京國汝爲繁華戀故鄉幼小閨中同刺繡晨昏
窓下共焚香如今兩地遙相憶好把平安數寄將

續詩女史

楊文儷

擬芍藥云禁畧名花本自奇上公相對更相宜風香
暗度黃金闕國色新分白玉墀傍檻開時如索笑當
堦翻處欲催詩栽培地位元殊絕贏得年年雨露滋
憶京師籠鋌鈞三子云旅居抱病自躊躇荏苒流光
逼歲除天畔雙魚無處覓日邊三鳳竟何如文園司
馬鷹裁賦漢闕孫弘待上書南土只今多寇盜倚門
焉得鬱懷舒

鋌以翰林編修考績予得晉封夫人有述云濫膺新

典夫人貴始信從前教子功天府鸞章今賜誥秋闈
螢火昔九熊衣穿錦鶴君恩渥腰繫文犀夫秩崇迂
拙此身何所補惟將虔禮答蒼穹

初夏即事云朱明初屬夏暑氣漸侵軒日午槐陰密
風晴柳絮翻黃雲連麥隴紅雨落花園恰恰鶯聲老
喃喃燕語喧鈎簾對佳景欲賦已忘言

少年行云長安少年狐白裘肥馬金鞍何處遊春風
桃李東西陌翠管銀箏十二樓

聞徵瓦氏兵至云共傳瓦氏勇超群萬里徵來淨寇
氛多少材官屯海畔策動還讓女將軍

陳淑柔

淑柔姓陳氏上虞人也

和李太白潯陽紫極宮感秋二首云明月浸碧梧涼
風度疎竹飄然爽思開清虛不可掬遙憐紫極宮佳
興應誰獨謫仙去不返列爲上天宿未訝東坡禪怪
問君平卜孔孟世固遠斯文久不復悵望白雲飛何
時親舍覆憶我先君詩橘肥白酒熟

可愛秋色佳清光在松竹菊滿東籬金采采香盈掬
寄傲倚南窓樂豈淵明獨希夷避俗情終就華山宿
心閒在知幾奚用訪醫卜玉露承金莖不見朱顏復

澄江泛虛舟何患風波覆欲得方朔桃時待千年熟
清風鎮王烈婦和韻二首云世亂奚逃無妄災鸞離
雛散此方來六軍可逐軀先去一劔難將志憤回齧
指血書千古在投厓怨氣幾時開化鷓來叫山前月
訴與夏天亦痛哉

一起胡兵城郭突勤王那迫郭汾來寧甘白刃風前
冒不惜清魂月下回弔古莫辭芳草合尋詩須拂蘚
塵開縉紳尚有偷生士遙見清風益愧哉
即事云曉牕初見葛萋萋撫景重思南國詩絺綌成
來夏將半歸寧無復見親期

費蘭軒

蘭軒姓費氏嘉興人塩商妻也游上天竺題觀世音
詩云瓶插楊枝甘露漿百花叢裡號高王白鶯飛繞
瑠璃殿翠竹環遊瑪瑙牀寶庫盡懸金絡索法身常
掛玉玳瑁普陀岩畔無心住天竺山中閃道光

張氏

張氏號月仙仁和人秀麗知音律雅善于琴惜不得
其所匹也寄人詩云明月吳山下因風想玉珂夢從
今夜短瘦比舊時多花信稀難問琴心冷未和上林
顏色好頭白意如何

何氏

何氏錢塘人號月桂仙少以人云織羅步入百花叢
粉蝶雙雙鬪晚風倚徧雕闌空抱恨謾將錦字附歸
鴻

索四娘

索四娘北教坊妓也送人柳枝詞云帶雨拖雲百尺
長折來空自斷人腸柳絲繫得即舟住再向江邊插
幾行

劉桂紅

劉桂紅南教坊妓也嘗作閨怨云離居垂妾淚遠役

斷君腸不及樓中燕雙雙語回梁又云自君千里別
看月幾回圓織得相思字無因托鴈傳

詠淚云不覺襟前落寧知心已灰欲流時萬結難禁
日九迴寸寸啼中破雙雙恨裡催自然堪涕泗非是
聽猿哀

覽鏡貽別云離別牽腸淚不禁願君常記白頭吟相
看臺上菱花月莫照容顏照妾心

葛賓月

葛賓月古意寄人云青青麋蕪枝鬱鬱故山垂詎知
昔慊慊遽作今凄凄憶昔謬恩私憐君特見宜死矣

言女史十四
羞比翼齒首惜連絲君持可憐意妾誓始終期妾心
君故知妾身不自賞情知非分理俗態橫相持遂令
君意失翻謂妾心移鍾山尚有巔淮水尚有涯妾意
直如此寧將衰草齊冰輪墮羅帳可以鑒情思黛歛
風前怨紅翻夢裏啼知君相悟否泪盡此絨辭亦南
教坊妓也

趙燕如

趙燕如南教坊妓春怨云鴈關音信斷蘭閨物候妍
草色三春兩鶯啼二月天覽鏡紅顏改絨書錦字鮮
相思不自抑愁倚玉樓前

龐文英

文英字素卿亦教坊妓也春日見桃李詠賦云桃李
競芳春穠華自可人本非清蕙質安得出風塵
贈一舉子云昨夜凌風上廣寒五雲深處恣盤桓休
教影散瑤池會還許飛瓊月下看嘉靖丁酉間名動
京師士大夫皆稱為龐斯文云

雅素美人

美人遺姓氏杭妓也性尚雅淡每穿銀紅衣人因稱
之曰雅素美人後歸于鹽商為妾人又皆惜而謂之
美人賦詩自解云淡紅衫子淡紅裙淡掃蛾眉淡點

唇只為一生都着淡故將身嫁賣瑄人亦慧劇也

存兒

存兒嘗書一扇云寒落山城露草光坐殘明月夜生涼何時重把幽情寫為解絲桐出錦囊後書小妹存兒有感錄奉秋壑妙人惜不知其姓氏也亦金陵妓

金端行

金端行紹興嵯縣人幼入樂藉王氏為妓因冒王姓嘗耻其托身非所故自名曰端行而號雪琴蓋期賞音于清絕也仍自題一律云幾縷芳心托素絲陽春一曲寄相思六花帶雨投絃急三白回風入指遲初

逐落梅迷鴈足半隨飛絮襲龍池江南尚有知音在何必黃金鑄子期每游于杭性嗜瓊果善劇飲非風流勢家不能邀之喜為人書扇皆自作也

李筠

李筠字鳳翔餘姚人也十歲能書通樂府大義十四即能咏歌然家世樂藉非其志也故其春閨課舞詩云薄命春園婦嬌歌不忍聞月低桃葉扇風動石榴裙羅薦含春暖華燈照夜分幾回公子宴勉強侍殷勤嘉靖癸亥筠年二十有二嘗寄余所作如夜坐云夜久燈花落液淚滿銅荷乃知消息理榮華憂患多

又云客中頻見月貪立露華冷徘徊歛衣袂愁人畏
見影

客中聞禽云杜鵑何意二更啼杏子枝頭片月低忽
憶故園眠不穩春風吹過玉闌西又云牡丹無比有
餘春啼鳥聲聲欲訴人白玉屏開光照掃愁來羞殺
靚粧新

夢中云桂樹參差小院東五年風雨記飄蓬情多可
是分明見路遠何勞夢寐通燈結細花成穗落淚題
愁字帶痕紅屏幃深鎖天涯隔知是吳山第幾峯
未幾游雲間從良于嘉禾

詩文史後序

餘杭 蔣灼

世謂女之職惟工織紵主中饋司內事爾至於操觚
染翰非其所專夫錦上迴文亦織紵也炊炭庖烹伏
雌亦中饋也女媀代津卒以濟趙黃崇嘏歷顯仕而
辭婚兼外事也昔仲尼刪詩而柏舟諸篇並列風雅
是可謂不專於吟翰者耶王化衰仲尼歿作者既希
傳之愈鮮其胡笳團扇僅附於離騷而杞梁釣竿空
聞於樂府或題在而辭亡或辭存而名逸徒增遐想
莫覩全書嗟夫男女同生性情同感商與宮而合調

言女史後集
凰隨鳳以諧聲其能並駕於騷壇而抗衡於墨士者
代固不乏也而顧乃使之逸而不傳傳而不廣茲非
風雅之一痛哉社友田子藝迺博采旁搜編緝成史
遂使今古佳人得聯芳於藝苑宮閨秀句不殞葉於
詞林矣且柳絮一言取崑山之片玉花藥百首聚金
谷之群葩雖詢采或遺而美刺攸寓其淫者可以使
賤婢見之而羞稱正者可以使士君子聞之而樂道
則播之聲歌未必不協宮商而諧皇鳳也世有知音
行將傾耳

嘉靖丙辰秋八月社日

詩女史

拾遺

錢塘田藝衡撰

吳二孃

吳二孃者江南人也有曲云暮雨瀟瀟郎不歸為時
所賞故白居易詩云吳孃暮雨瀟瀟曲是也

南陽娼婦

南陽一娼婦作離別曲云妾家鄧侯國肯愧邯鄲姝
世本富繪綺嬌愛比明珠十五學組紉未嘗開戶樞
十六失所適姓名傾里閭十七善歌舞使君邀宴娛
自有茲樂府不得同羅敷涼温忽在再屢接朝大夫

詩女史拾遺

相歡不及情何異逢路衢昨日一見即目色曾不渝
結愛從此篤暫隔猶云疎如何遂從宦去涉千里途
即跨青驄馬妾乘白雪駒送郎郎未遠別妾妾仍孤
不如水中鱗雙雙依綠蒲不如雲中鵠兩兩下平湖
魚鳥尚有託妾今誰與俱去去約春華終朝怨日賒
一心留杏子便擬見梅花梅花幾時吐頻搯闌干數
東風若見郎重爲歌金縷

蘇小妹

小妹者蘇子瞻之妹也秀慧而額頗高凸軾嘗戲之
云蓮步未離香閣下梅粧先露畫屏前妹即應聲云

欲扣齒牙無處覓只聞毛裏有聲傳蓋子瞻多髯故
亦戲言之也

張珍奴

張珍奴吳興妓也色華美性澹素每夕沐浴更衣炷
香告天求脫樂籍甚切一日有士人訪之珍奴見其
風神秀異殊敬之既而即飄然去明日又至如是月
餘終不及亂珍奴曰荷君眷顧甚久獨不留一宿豈
妾鄙陋不足以奉君子乎士曰不然而人貴心相知何
必如是且汝每夜告天實何所求珍曰失身於此又
將何爲但念入是門中強施粉黛以假爲真歌謳艷

曲以悲爲樂本是一團臭膿皮袋借僞飾以惑人每
歎世之愚夫不自尊貴過我門者覩我如花情牽意
惹留戀不捨非但傷財多致殞命妾雖減容交歡得
罪逾重唯昕夕告天早期了脫士曰汝志如何不
學道珍曰陷於此地何從得師士曰吾爲汝師可乎
珍即拜扣士曰再來乃可遂去珍日夜望不至深自
悵恨因書曰逢師許多時不說些兒個安得仍前相
對坐懊惱韶光空自過直到如今悶損我筆未竟士
忽來見所書續其韻曰道無巧妙與你方兒一個子
後午前定息坐夾脊雙關崑崙過恁時得力思量我

珍大喜士乃以太陰鍊形丹法與之珍自是神氣裕
然若大開悟臨別作一詞云坎離坤兌分子午須認
取自家宗祖地雷震動山頭雨要洗濯黃芽出土捉
得金精牢閉固煉庚申要生龍虎待他問汝甚人傳
但說道先生姓呂珍方悟是呂公嵩即佯狂丐於市
投荒地密脩其訣三年尸解而去時宣和中也

秦學士女

靖康間有女子爲金虜所俘自稱秦學士女道中題
詩云眼前雖有還鄉路馬上曾無放我情讀者悽然
有作秦女行哀之者或云少游女也

蒲芝

蒲氏名芝益州郫人張少愚愈之妻也少愚雋偉有大志屢舉不第用薦除校書郎不受隱于家文彥博治蜀爲置青城山白雲谿杜光庭故居以處之六召不應樂山水遇有興雖數千里輒盡室往遊芝賢而有文故能同調也及愈卒芝爲之誄曰高視徃古哲士實殷施及秦漢餘烈氛氲挺生英傑卓爾逸群孰謂今世亦有其人其人伊何白雲隱君嘗曰丈夫趨世不偶仕非其志祿不可苟營營末途非吾所安吾生有涯少實多艱窮亦自固困亦不顛不貴人爵知

命樂天脫簪散髮眠雲聽泉有峯千仞有溪數曲廣成遺址吳興高躅疏石通徑依林架屋麋鹿同群晝遊夜息嶺月破雲秋霖洒竹清意何窮真心自得放言遺慮何榮何辱孟春感疾閉戶不出豈期遂徃英標未隔杼詞哽噎揮涕汎瀾人誰無死惜乎材賢已矣吾人嗚呼哀哉

金麗卿

金麗卿杭州人廣信道中詩云家住錢塘山水圖梅邊柳外識林蘇平生慣占清涼國豈料人間有暑途

平江伎

嘉定間平江一伎女送太守詞曰春色元無主荷東
君着意看承等閒分付多少無情風浪又那更蝶欺
蜂妬弄燕雀眼前無數縱使簾籠能愛護到如今已
是成遲暮芳草碧遮歸路看看做到難言處怕見仙
郎旌旗輕易歌檣榜月滿西樓絃索靜雲蔽崑城閬
府便任地一帆輕舉獨倚闌干愁碎慘玉容淚眼如
紅雨去與住兩難訴

余叔柔

余叔柔豐城道中浪淘沙詞云雨溜風鈴滴滴丁丁
釀成一枕別離情可惜當年陶學士孤負郵亭邊

鴈帶秋聲音信難憑花鬢偷數卜歸程料得到家秋
正晚菊滿寒城一作金淑柔寶祐間人

阮碧雲

阮碧雲元大都妓也詩云東君情意漲如瀾画閣死
衾夜不寒十二樓中春色透好花開遍玉闌干

啞女

啞女者莫詳其姓名亦不知何許人熙寧中見于鄞
之戒香寺婉變卅角年若及笄瘖不能言惟日持帚
垂臂跣足晨粥午飯每拾菜滓餽餘啖人以爲顛駭
歷人家預知吉凶以爲欣戚里士周鏐學舉子業女

則屢至其家鶚知其非常至則必延以蔬飯一日未
及食忽起書偈於壁曰三界火宅衆苦具備報汝諸
人求早出離後又造鶚值鶚趣裝將應舉女笑不止
鶚疑焉再三叩之遂索筆作長短句云風波未息虛
名浮利終無益不如早去倍簞笠高臥煙霞千古企
難及君今既已裝行色定應鴈塔題名籍他年若到
南雄驛玉石休分徒累卞和泣鶚襲而藏之一日露
臥鎮明嶺下或訶以不檢遽起歸寺長吁坐逝時三
月三日也鶚爲具棺襯瘞之柳亭後鶚見女于京師
追問之不就歸發其瘞則空棺也後鶚果如南雄以

言邊事忤時相入黨籍衛開客洛陽遇李士寧曰公
鄉里啞女者過去維衛也子可歸禮之比歸已化開
以不及見其生爲恨明年游錢塘寓書吏陳式家見
羣兒數十執幡蓋擁一尼童入門譁傳曰啞啞啞開
驚顧女索紙筆書偈云大地山河是阿誰了無一法
可思惟夜來處處鳴鐘鼓敲破髑髏人不知又云須
彌山上擺鐸大洋海底搖鈴若問啞女姓字只此便
是真名擲筆徑去開復追問小兒啞女何人曰維衛
佛也又問兒等何人曰問取啞女忽俱不見

孫氏

孫氏者張復妻也鄰人周默善方藥張暴病煩周切
脉默見孫秀艷念無計得之白其母召飲接鄰好挑
之孫不對默念吾且年少孫亦妙齡其夫極老乃折
簡爲詩送之曰五十衰翁二十妻日昏髮白已頭低
絳幃深處休論議天外青鸞伴木雞孫答詩曰雨集
枯荷時暫綠藤籠老木一番新如今且悅目前景裝
點亭臺隨分春又附簡云每得子書急看即毀恐彰
子之惡也因醫之功要而取之市里庸人有不爲者
况士人乎默爲宜興縣簿三年歸訪之則復已死矣
乃遣媒與孫通好娶之

趙姬

淳祐間樞密趙葵嘗酌客堂食後宴于私第既歸則
席設樂具而不見諸姬侍信菴自往訪之乃群聚于
後園中摘青梅信菴怒諸姬內一姬能詩信菴令賦
之姬即口占云柝聲驚報早朝回滿院春風繡戶開
怪得無人理絲竹綠陰深處摘青梅公笑而釋之

羅惜惜

惜惜浙東羅仁卿之女幼與鄰兒張幼謙同學能詩
比長張求婚羅以貧不許謙隨父至京兩年方歸羅
已受他聘矣非其志也因期謙私會遂訂後盟曰此

志不從君其索我于井中耳復別去經年而歸則惜
惜適將歸人矣因賦一詞寄謙云幸得那人歸怎便
教來也一日相思十二辰直是情難捨本是好姻緣
又怕姻緣假若是教隨別箇人相見黃泉下乃卜筮
子謙私往處半月餘爲仁卿所覺執赴有司追原其
情遂斷惜惜歸幼謙焉

陳梅莊

陳氏號梅莊提刑陳仲微女也有詩云一寸柔腸萬
疊縈那堪更值此春晴黃鸝知我無情緒飛過花梢
嚙不聲又云山城落日弄昏黃又了浮生半日忙侍

女不須燒絳蠟讓明月入回廊其夫胡爲新昌丞
將之瑞州陳賦詩曰一片愁心怯杜鵑嬾妝從恁髮
雲偏怕卽說起陽關意常掩琵琶第四絃

達睦妻

達睦元丞相至正帝失政丞相有憂色夫人諫曰相
公國家大臣時勢可爲則爲之脫不可爲卽當致身
死節他亦無策也又曰人生如寄與其履此危機孰
若引身勇退或可全終古人云躍馬食肉四十年足
矣何有百歲人生者哉乃作一日樂歌以諷之曰一
日生一日樂明日不如今今日不如昨紅顏忽黃耆

黔首徒白髮纔見好花開又見好花落川水古至今
東流終不復功名富貴須及時瞻烏爰止誰家屋嗚
呼上智人知幾心自足丞相蓋不能從也

潘拱璧

拱璧字玉貞南陽人四川通政潘萬斛女也色秀媚
人皆以海棠紅呼之因題其詩曰海棠集適武功蘇
道春嘗期蘇生云八面明窓次第開佇看環珮下瑤
臺閨門春色連新柳嶺角寒香帶早梅影動花梢明
月上風敲竹徑故人來合歡一幅鴛鴦錦都付東君
自翦裁幸夫遠回作西江月云憶自滎陽話別覺來

春燕秋鴻今朝忽遇暮雲東對坐窓前說夢綉幕羅
幃夜月竹籬茅舍棲風不知身在廣寒宮偷把瑤琴
一弄聞夫信自悼云終日思君不見君數聲漁唱不
堪聞匣中破鏡收殘月篋裡餘衣斂斷雲杜宇春深
啼亂血桃花風急散飛紋玉釵敲斷情難斷踈柳殘
蟬泣未分菩薩蠻云窓前纔掃傷心雪出門又對銷
魂月不見玉樓人夜深風露清人生不滿百百歲如
朝夕何苦泪闌干凄凉度歲寒

賦景云羞傍粧臺整玉容翠翹浮動寶釵籠羅裙半
濺瀟湘水金線斜牽太液風鶯囀上林花滿地客遊

三月草侵蓬倚窓盡日渾無事欲把珊瑚闥石崇
梅花云一枝春寄小江南獨自迎霜獨自寒淡月細
香清絕處玉人和淚倚闌干

春暮雨晴云窓外花含宿雨低喜看寒碧漲前溪出
門檢點春多少綠暗紅稀鶯亂啼

何氏

何氏滁州人羅汀妻元脫脫家奴陳威殺汀而奪之
何作詩曰悠悠世事日沉浮蹤跡飄然不係舟痛醉
難消千古恨狂吟終抱一生愁追隨佳會真成枉提
起鍾情總未休朝去暮來雲雨惡相思只在此心頭

詩女史

拾遺二

成都李元齡撰

武則天

武氏陪駕幸嵩山刻石詩云陪鑿泮柰苑侍賞出闈
闈雲掩攢峯蓋霞低擁浪旂日宮疏澗戶月殿啓巖
扉金輪轉金地香閣曳香衣鐸吟輕吹發幡搖薄霧
霏昔遇焚芝火山紅迎野飛花臺無半影蓮塔有全
輝寔賴能仁力攸資善世威慈緣興福緒於此永皈
依風枝不可靜泣血竟何追所云金輪者自稱金輪
大周皇帝者也又書一首暑候將闌炎序弭溽山林

言女只道二
靜寂梵宇清虛宴坐經行想當休愈弟子前隨鳳駕
過謁鷲巖觀寶塔以徘徊睹先妃之淨業薰修之所
猶未畢功一見悲驚萬感兼集攀光寶樹載深風樹
之哀弔影珠泉更積寒泉之思弟子自惟薄祜鎮切
焚懷每屆秋期倍軫摧心之痛矣涼運逾添切骨
之哀未極三旬頻鍾二忌恨乘時而更恨悲踐露而
逾悲惟託福田少申荒思今欲續成先志重置莊嚴
遣三思齋金帛等物徃彼就師平章幸識斯意即務
修營望及諱辰終此功德所冀罄斯誠懇以奉津梁
稍宣資助之懷微慰熒迷之緒累書示意指不多云

永淳二年九月二十五日

紅綃

紅綃唐大曆中勲臣一品妓也與崔生約崔歸家思
之作詩曰悞到蓬山頂上遊明璫玉女動星眸朱扉
半掩深宮月應照瓊芝雪艷愁後用崑崙奴磨勒計
夜入第三院見紅綃長嘆而坐且吟詩曰深谷鶯啼
別院香偷來花下解珠璫碧雲飄斷音書絕空倚玉
簫愁鳳凰磨勒復負生與姬飛出重垣歸老于家自
有傳

陳氏

陳氏司空陳霸先女也王大司馬僧辨下京師功為
天下第一陳司空次之僧辨畱守石頭城命司空守
京口推以赤心結廉藺之分且為第三子願約娶司
空女願有才貌嘗入謝司空女從隙窺之感想形
於夢寐謂其侍婢曰世寧有勝王郎子者乎婢曰昨
見吳興東閣日直陳子高且數倍王郎子蓋舊解郡
佐司空在鎮女果見子高而悅之喚欲與通子高初
懼罪謝不可不得已遂私焉子高之器其偉女絕愛
之嘗盜其母閣中珠寶與之價直萬計又書一詩白
團扇畫比翼為其上以遺子高曰人道團扇如圓月

儂道圓月不長圓願得炎州無霜雪出入歡袖百千
年事漸泄會王僧辨有母喪未及為願禮娶子高嘗
恃寵凌其侶因為竊團扇與願且告之故願忿恨以
語僧辨用他事停司空女婚司空怒且謂僧辨之見
圖也遂發兵襲僧辨併其子縊殺之舊率子高實為
軍鋒焉自是子高引避不敢入舊知之仍領子高之
鎮女以念極結氣死司空為武帝崩舊後從猶子入
嗣大統子高為右衛將軍散騎常侍封文招縣子廢
帝時坐誣謀反誅人以為隱報焉

楊氏

楊氏宋寧宗后之妹也題南陽華祝寺畫四首人道
中秋明月好欲邀同賞竟如何華陽洞裡秋壇上今
夜清光此處多石楠葉落小池清獨下平梢弄扇行
蔽日綠陰無覓處不如歸去兩三聲清獻先生無一
錢故應琴鶴是家傳誰知默鼓無絃曲時向珠宮舞
幻仙雨洗東坡月色清市人行盡野人行莫嫌犖确
坡頭路自愛鏗然曳杖聲書曰楊妹子是也

范仲胤妻

仲胤為相州錄事久不歸其妻寄詞云西風昨夜穿
簾幙閨院添蕭索最是梧桐零落迤邐秋光過卻人

情音信難託教奴獨自守空房淚珠與燈花共落乃
伊川令也仲胤拆覽之伊字誤作尹字遂作行香子
寄回云頓首啓情人即日恭惟問好音接得綵箋詞
一首堪驚題起詞名恨轉生展轉憶多情寄與音書
不致誠不寫伊川題尹字無心料想伊家不要人妻
復答云奴啓情人勿見罪間將小書作尹字情人不
解其中意共伊間別幾多時身邊少箇人兒睡胤見
之大笑稱賞即日歸家時人咸稱之

耿玉貞

盧絳病瘧且死夜夢白衣婦人歌曰玉京人去秋瀟

索畫簷鵲起梧桐落欵枕悄無言月和殘夢圓背燈
唯暗泣甚處碾聲急眉黛遠山攢芭蕉生暮寒一作
獨自倚闌干衣襟生暮寒乃菩薩蠻也勸絳酒歌數
闕因謂絳曰子之疾食蔗即愈如言果差迨數夕又
夢前婦人曰妾乃玉真也他日富貴相見於固子坡
後入金陵累官柱國唐亡歸宋以龔慎儀事坐誅臨
刑有白衣婦女同斬姿貌宛如所夢問其受刑之地
即固子坡也婦人姓耿名玉真其夫死與前婦之子
通當極法與絳同斬焉

馮氏

馮氏宋人因其夫稱夫人其法信偈曰隨緣任業言
多年枉作老牛為耕田打疊身心早歸去免教鼻孔
受人穿見龍舒靜土文

尹温儀

尹温儀成都良家女後以零替失身妓籍蔡丞相帥
成都酷愛之尹告蔡乞除樂籍蔡戲曰若尊前成一
小闕便可除免尹曰乞腔調蔡荅以西江月尹又乞
巖韻蔡曰汝排行第九用九字即便應聲云韓愈文
章盖世謝安才貌風流良辰開宴在西樓敢勸一杯
芳酒記得南宮高過弟兄都占鰲頭一門玉殿御香

浮名在甲科第九蓋取蔡元長第九人第元度第十
一人也復齋漫錄又曰姑蘇官妓蘇瓊行第九元長
過蘇州太守召飲元長聞瓊能詞因命即席以九字
爲韻未知孰是或曰溫儀于郭帥席上作木蘭花云
浣花溪上風光主燕夕桃源開幕府商崑本是作霖
人也使閒花沾雨露父兄世業傳儒素何事失身非
類侶若蒙化筆一吹嗟免使飄零飛綉戶帥大悅即
與除籍

張怡雲

張怡雲大元京師名伎也能詩詞善談笑藝絕流輩

趙松雪商正叔高房山皆爲寫怡雲圖以贈諸名公
題詩殆遍姚菴閻靜軒每於其家小酌一日過鐘
樓街遇史中丞下道笑而問曰二先生所往可容侍
行否姚云中丞上馬史於是屏騎從速其歸携酒饌
因與造海子上之居姚呼曰怡雲今日有佳客此乃
中丞史公子也我輩當爲爾作主人張便取酒先壽
史且歌雲間貴公子玉骨秀橫秋水調歌一闕史甚
喜酒饌至史取銀二定酬歌席終左右欲徹酒器皆
金玉者史云休將去留待二先生來此受用其賞音
有如此者又嘗佐貴人尊俎姚閻二公在焉姚偶言

暮秋時三字闕曰怡雲續而歌之張應聲作小婦孩
兒且歌且續曰暮秋時菊殘猶有傲霜枝西風了却
黃花事貴人曰且止遂不成章張之才亦敏矣

劉燕歌

劉燕歌同時妓善歌舞齊參議還山東劉賦太常引
以餞云故人別我出陽關無計鎖雕鞍今古別離難
兀誰畫蛾眉遠山一尊別酒一聲杜宇寂寞又春殘
明月小樓閒第一夜相思泪彈此曲膾炙人口

張玉蓮

玉蓮即張四媽凡舊曲其音不傳者皆能尋腔依詞

唱之絲竹咸精蒲博盡解笑談疊疊文雅彬彬審音
知律時無比馬林經歷嘗以側室置之後再占樂籍
班彥功與之甚狎班司儒秩滿北上張作折桂令贈
之末句云朝夕思君泪點成斑亦自可喜又有一聯
云側耳聽門前過馬和泪看簾外飛花尤為清絕

一分兒

一分兒姓王氏京師角妓也歌舞絕倫聰慧無比丁
指揮會才人劉士昌程繼善等於江鄉園王氏佐樽
時有小姬歌菊花會南呂曲云紅葉落火龍褪甲青
松枯恠蟠張牙丁曰此沉醉東風首句也王氏可足

成之王應聲曰紅葉落火龍褪甲青松枯恠鱗張牙
可誅題堪描畫喜觥籌席上交雜荅刺蘇頌斟入禮
廝麻不醉呵休扶上馬一座歎賞聲價愈重焉

劉婆惜

劉婆惜樂人李四之妻也江右與楊春秀同時頗通
文墨滑稽歌舞迥出其流時貴多重之先與撫州常
推官之子三舍者交好苦其夫間阻偕宵遁事覺決
杖劉負愧將之廣海居焉道經贛州時有全普菴撥
里字子仁由禮部尚書值天下多故選除監郡平昔
守官清廉但未免耽於花酒每日公餘即與士夫酣

歌賦詩帽上常喜簪花否則或果或葉亦簪一枝劉
過贛謁全公全曰刑餘之婦何足與也劉謂闈者曰
妾欲之廣海誓不復還久聞尚書清譽獲一見而逝
死無憾也全哀其志而與進焉時賓朋滿座全帽上
簪青梅一枝行酒全口占清江引云青青子兒枝上
結令賓朋續之衆未有對者劉歛衽進前曰能容妾
入辭乎全曰可劉應聲曰青青子兒枝上結引惹人
攀折其中全子仁就裏滋味別只為你酸留意兒難
棄舍全大稱賞納為側室後兵興全死節劉克守婦
道善終於家

王蘇蘇

王蘇蘇在南曲中屋室寬博庖饌有序女昆仲數人亦頗善諧謔有進士李標者自言李英公勳之後父在大諫王致君門下致君弟姪因與同詣焉飲次標題窓曰春暮花枝遶戶飛王孫尋勝引塵衣洞中仙子多情態畱住劉郎不放歸蘇蘇先未識不甘其題因謂之曰阿誰劉郎君莫亂道遂取筆繼之曰恠得犬驚鷄亂飛羸童瘦馬老麻衣阿誰亂引閒人到畱住青蚨熱趕歸標性偏頭面通赤命駕先歸後蘇蘇見王家郎君輒詢熱趕郎在否

盈盈

盈盈吳女也年十六善歌舞尤工彈箏容艷甚冶詞翰情思翹翹出群少年子爭登其門不惜金帛盈盈遴選佳偶乃許一笑魏人王山能為詩標韻清卓因省試下第薄游東海府守田龍召使侍宴山預其列相得于尊俎間忻處累月山告歸盈盈垂泣悲啼不能自止明年寄傷春曲示山云芳菲時節花壓枝折蜂蝶掩闌干無法一旦醉花菟奠花骨蜂兮蝶兮何不來空使雕闌對寒月山作長歌荅之明年山適溜川遇王通判出盈盈札欲偕游東山紙尾一詞云枝

上差差綠林中蔽蔽紅已嘆芳菲盡安能尊俎空君
不見銅駝茂草長安東金鑣玉勒雪花驄二十年前
乃俠少纍纍昨日成衰翁幾時滿飲流霞鐘共君倒
在夕陽中山偶病不克赴其約秋中又如山東盈盈
已死又唐天寶時亦有盈盈見傳中

桂英

桂英山東妓也容色絕艷王魁下第入萊州友人招
游比市桂英酌酒曰某名桂英酒乃天之美祿足下
得桂英而飲天祿明春登第之兆乃取擁項羅巾請
詩生題曰謝氏筵中聞雅唱何人曼玉在簾幃一聲

透過秋空碧幾片行雲不敢飛桂曰君但爲學四時
所胥我爲辦之由是魁朝去暮來踰年有詔求賢桂
爲辦西游之用將行至州北海廟神盟曰吾與桂誓
不相負若生離異神當殛之魁至京寄詩曰琢月磨
雲輸我輩都花占柳是男兒前春我若功成去好養
鴛鴦作一池後唱名爲天下第一魁私念科名若此
以一娼玷辱况家有嚴君不容也不復與書桂寄詩
曰夫貴婦榮千古事與君才貌各相宜又曰上都梳
洗逐時宜料得良人見即思早晚歸來幽閣內須教
張敞畫新眉又曰上國笙歌錦綉鄉仙郎得意正踈

狂誰知憔悴幽閨客日覺春衣帶系長魁父約崔氏
為親授徐州僉判桂喜曰徐州此去不遠當使人迎
我矣遣僕持書往魁方坐廳決事大怒叱書不受桂
曰魁負我如此當以死報之揮刀自刎魁入南都試
院有人白燭下出乃桂也魁曰汝固無恙乎桂曰君
輕恩薄義負誓渝盟使我至此魁曰我之罪也為汝
飯僧誦佛書多焚紙錢捨我可乎桂曰得君之命即
止不知其他也魁欲自刺母曰汝何悖亂如此魁曰
日與寃會逼迫以死母召道士馬守素屢醮守素夢
至官府魁與桂髮相繫而立有人戒曰汝知則勿復

醮也後數日魁竟死

妙總

妙總尼也其詩云一葉扁舟汎渺茫呈梳舞棹別宮
商雲山海月都拋卻贏得莊周蝶夢長

美奴

美奴陸藻侍兒藻字敦禮美奴能詩詞如夢令云日
暮馬嘶人去船逐清波東注後夜最高樓還肯思量
人否無緒無緒生怕黃昏疎雨卜筊子云送我出東
門乍別長安道兩岸垂楊鎖暮烟正是秋光老一曲
古陽關莫惜金尊倒君向瀟湘我向秦魚鴈何時到

舒氏

舒氏王齊叟妻齊叟字彥齡任俠有聲善為詞曲而妻亦工篇翰其婦翁出武列事之素不謹翁不能堪取女歸竟至離絕女在父家一日行池上有懷其夫作點絳唇云獨自臨流悶來強把闌干凭舊愁新恨耗卻年時興鷺散魚潛煙斂風初定波心靜照人如鏡少箇年時影元祐間人也

樂婉

樂婉杭妓施酒監贈以上箕子云相逢情便深恨不相逢早識盡千千萬萬人終不似伊家好別你登長

道轉更添煩惱柳外朱樓獨倚闌滿目園芳草樂婉答云相思似海深舊事如天遠淚滴千千萬萬行更使人愁腸斷要見無因見了終難拚若是前生未有緣待重結來生願

惠英

惠英妓也洪邁守會稽席上對雪觀梅惠英即自製述懷曲歌之云梅花似雪剛被雪來相挫折雪裏梅花無限精神總屬他梅花無語只有東風來作主傳語東君且與梅花作主人蓋減字木蘭花也梅以自喻雪指無賴惡少也忠宣公大加稱賞

蕭淑蘭

蕭淑蘭杭人也與張世英菩薩蠻云君心情遠迷蓬
島妾心命薄連芳草芳草正萋萋君心知不知妾身
輕似葉君意堅如鐵妾意爲君多君心弃妾何又送
世英渡江云無情水滿西興渡多情人在西興去西
興去路遙教奴魂夢勞今將心內苦聯作相思句君
若見情詞同諧連理枝又無名氏離思云有情潮落
西陵浦無情人向西陵去去也不教知怕人畱戀伊
憶了千千萬恨了千千萬畢竟憶時多恨時無奈何
疑卽淑蘭也

陳鳳儀

陳鳳儀成都妓與一帥相得及送入朝賦玉連環云
蜀江春色濃如霧擁雙旌歸去海棠也似別君難一
點點啼紅兩此去馬蹄何處沙堤新路禁林賜宴賞
花時還記得西樓否

鄭雲娘

鄭雲娘寄張生西江月云一片冰輪皎潔十分桂魄
婆娑不施方便是如何莫是嫦娥妒我雖則清光可
愛奈緣好事多魔仗誰傳與片雲呵渡取霎時則箇
張生寄雲娘云一望朱樓巧小四邊繡幕低垂箇人

活脫似楊妃倚遍闌干十二最苦兩雙情眼難禁四
隻愁眉無言回首日沉西不道一聲安置雲娘又寄
張生堯上鞋兒云朦朧月影黯淡花陰獨立等多時
只怕冤家垂約又恐他側畔人知千回作念萬般思
想心下暗猜疑驀地得來廝見風露下語顫聲低輕
移蓮步暗卸羅衣攜手過廊西正是更闌人靜向粉
卽恣意矜持片時雲雨幾多歡愛依舊兩分離報道
情郎且住待奴堯上鞋兒張生又寄小重山云杏花
無煙燒斷腸織成春恨切柳絲長當時誰是種花郎
卻不教柳近杏花傍柳道不須忙春深須是有絮飛

揚等閒撲着杏腮香恁時節選甚隔池塘

鄭意娘

鄭意娘揚思厚妻宣政時人亂離流落嘗作好事近
云往事與誰論無語暗彈青血何處最堪腸斷是黃
昏時節倚樓凝望又徘徊誰解此情切何計可同歸
鴈趁江南春色曲入冥云盡日倚危欄觸目凄然乘
高望處是居延忍聽樓頭吹畫角雪滿長川荏苒又
經年暗想梁園與民同樂五門南僧院仍存宣政字
不見鰲山又勝州令云杏花正噴火朦朧微雨曉來
初過夢回聽乳鶯調舌紫燕競穿簾幙垂揚影裏粉

言女只道二
十四
牆映出鞦韆索對媚景贏得雙眉鎖翠鬢信任誰
更快梳掠追思向日共箇人同攜手畧無暫時拋墮
到今似海角天涯無由見得則箇番思往事上心向
他誰行訴卻會舊歡淚滴真珠顆意中人未覩覺鳳
幃冷落都是嗙啞錯被他閑言仗語啜做到此近四
五千里為水遠山遙闊當初曾言盡老更不重婚卻
甚鎮日共人同歡樂傳粉在那裏肯念人寂寞終待
把雲牋細寫把衷腸盡總說破問伊怎下得憐新弃
舊頓乖盟約可憐命掩黃泉細尋思都為它一箇你
感煞虧我

聶勝瓊

聶勝瓊京師名妓寄李之間思遠人云玉慘花愁出
鳳城蓮花樓下柳青青清樽一曲陽關後別箇人
第五程尋好夢夢難成况誰知我此時情枕前淚共
芭蕉雨隔箇窓兒滴到明

昉昉

昉昉侑浩翁惜春容云少年看花雙鬢綠走馬章臺
絃管逐而今老更惜花深終日看花花不足坐中美
女顏如玉為我同歌金縷曲歸時壓得帽簷軟頭上
春風紅簌簌即玉樓春也

京師妓

京師一妓瑞鷓鴣云昔時曾從漢梁王濯錦江邊醉
幾場拂石坐來衫袖冷踏花歸去馬蹄香當初酒饒
寧辭醉今日愁來不易當暗想舊遊渾似夢芙蓉城
下水茫茫即七言律也

妙香

鄭繼超遇田參軍贈妓曰妙香數年告別歌一曲以
送酒云勸君酒莫辭花落拋舊枝只有北邙山下月
清光到死也相隨翌日同至北邙山下化狐而去

詩女史

拾遺三

成都李元齡

採桑二女

孔子去衛適陳塗中見二女采桑孔子曰南枝窈窕
北枝長谷曰夫子游陳必絕糧九曲明珠穿不得著
未問我採桑娘孔子至陳大夫發兵圍之令穿九曲
珠乃釋其危孔子不能使回賜返問之其家謬言女
出外以一瓜獻二子子貢曰瓜子在內也女乃出語
用蜜塗珠絲將繫蟻蟻將繫絲如不肯過用烟薰之
孔子依其言乃能穿之于是絕糧七日東方朔七諫

云路室女之方桑兮孔子過之以自侍者此也

浣沙二女

謝靈運守永嘉游石門洞入沐鶴溪旁見二女浣沙
顏貌娟秀非塵俗態以詩嘲之曰我是謝康樂一箭
射雙鶴試問浣沙娘箭從何處落二女邈然不顧又
嘲之曰浣沙誰氏女香汗濕新雨對人默無言何事
甘良苦二女微吟曰我是潭中鯽暫出溪頭食食罷
自還潭去踪何處覓吟罷不見康樂遂回見青田志

李飛仙

元大都妓李飛仙者越人也與客遊樂賦詩云桃李

芳菲二月天洞房春色十分妍欲知好景無邊處倚
翠隈紅興獨偏

蔣令女

蔣氏陽武令蔣興祖女也金人犯闕蔣死之女方笄
美顏色能詩詞為賊所虜至雄州驛題減字木蘭花
手壁云朝雲橫度轆轤車聲如水去白草黃沙月照
孤村三兩家天天去也萬結愁腸無晝夜漸近燕山
回首鄉關歸路難乃靖康間浙西人

劉令女

劉令女崑山人年才十九歲無所出忽當坐化乃作

言女身遺三
頌曰十九年來作客清淨無花無葉了了分明歸去
一任東西南北生也好死也好不論年多與年少今
日撥轉遇真空一輪明月清皎皎描也難描畫也難
畫滿頭插花盤和坐化盖有所得者
蚊蚋詩云昨日曾未與君期今朝擅自入羅幃玉體
任君殮一飽猶自嬌聲啼阿誰
剪子云有情兩股合無情兩股開快從腰裡取長短
任君裁

劉彤

劉彤字文美劉章文虎妻寄外臨江仙云千里長安

名利客輕離輕散尋常難禁三月好風光滿階芳草
綠一片杏花香記得年時臨上馬看人眼淚汪汪如
今不忍更思量恨無千日酒空斷九回腸

幼鄉

幼鄉感舊過龍門云極目楚天空雲雨無蹤謾留遺
恨鎖眉峯自是荷花開較晚辜負東風客館嘆飄蓬
聚散匆匆揚鞭那忍驟花馳望斷斜陽人不見滿袖
啼紅即浪淘沙

胡夫人

胡氏號惠齋狀元黃由妻也採桑子云與君別後愁

無限永遠團團間阻多方水遠山遙寸斷腸終朝等
候卽音耗捱過春光烟水茫茫梅子青青又待黃
燈花滿江紅云暝靄黃昏燈檠上熒熒初炙銀焰裊
孤光分夜寸心凝碧雷照嬌顏歡笑偶上元慶賞嬉
遊夕笑聚螢積雪與偷光寒儒憶蝶眷戀成何得花
傳喜知何日聽隣家昨夜扣閣誰覓燭短始知新月
上搖紅孤館因風急恨那人別後不成眠時時別

趙秋官妻

趙秋官妻書岐陽題郵亭武陵春云人道有情還有
夢無夢豈無情夜夜思量直到明有夢怎教成昨夜

偶然來夢裡鄰笛又還驚笛韻悽悽不忍聽總是斷
腸聲一作連倩女寄陳彥匡又洛陽女郎御街行云
一身萍梗隨郵傳恨歸路如天遠近來魂夢也踈人
不似舊時長見剩衾餘枕冷清清地空恁閑一半亦
書于岐陽郵亭未知孰是

孫氏

孫氏建安黃雲軒妻憶夫醉思仙云霽霞紅看山迷
暮紫烟暗孤松動翩翩風袂翻若驚鴻心似鑿髮如
雲美清影月明中謾悲涼歲冉冉舜華潛改衰容前
事消疑久十年光景忽忽念雲軒一夢回首春空彩

鳳遠玉蕭寒夜悄悄恨無窮嘆黃塵久埋玉斷腸酒
淚東風

劉氏

炎景丁丑歲有過軍挾一婦人經從長興和平酒庫
書沁園春于壁云我生不辰逢此百罹况乎亂離柰
惡因緣到不夫不主被擒捉去為妾為妻父母公姑
弟兄姨妹流落不知東與西心中事把家書寫下分
付伊誰越人北向燕之回首望鴈峯天一涯奈翠鬢
雲軟笠兒怎帶柳腰春細馬性難騎缺月疎桐淡烟
衰草對此如何不淚垂君知否我生于何處死亦竟

歸後書鴈峯劉氏題

吳氏

吳氏壽夫好事近云臘近漸知春已有早梅堪折况
是誕辰佳宴擁笙簧羅列玉盃休惜十分斟金爐更
頻熟連理願同千歲看蟠桃重結

劉金壇

劉金壇尼也山花子云標致清高不染塵星冠雲鬢
紫霞裙門掩斜陽無一事撫瑤琴鶴觀幽花偏惹恨
竹窓閒月最銷魂此際得教還俗去謝天尊

宋宗室夫人

宋宗室夫人極想思云柳烟霽色方融花露遍金莖
秋千院落海棠漸老才過清明嫩玉腕托香脂臉相
傅粉更與誰情秋波綻處相思淚迸天阻深誠

管仲姬

管仲姬漢父云人生貴極是王侯浮利浮名不自由
爭得似一扁舟美月吟風歸去休

王麗真

王麗真字字雙云床頭錦衾斑復斑架上朱衣般復
般空庭明月閒復閒夜長路遠山復山

曹仙姑

曹仙姑咏燈花西江月云零落不因春雨吹嗔何恨
東風紗窻一點自然紅費盡功夫怎種有艷難尋膩
粉無香不惹遊蜂更闌人靜畫堂中相伴玉人春夢

陶氏

陶氏閨怨云與君別情易許執手相將永遠成鴛侶
一去音書千萬里望斷陽關淚滴如秋雨到如今成
間阻等到侯郎來把相思訴看着梅花花不語花已
成梅結就心中苦蓋蘇模遮也

朱秋娘

朱秋娘集句採桑子云玉孫去後無芳草朱淑綠遍

香階李季塵滿粧臺吳淑粉面羞捺淚滿腮王幼教

我甚情懷李易去時梅蕊全然少竇夫等到花開蘇

小花已成梅陶氏梅子青青又待黃胡夫兀自未歸來

王嬌

李秀蘭

李秀蘭減字木蘭花云自從君去曉夜縈牽腸斷處
綠遍香階過夏經秋鴈又來想伊那裡應也情懷愁
不止縹緲書沉直至如今沒信音

蘇小娘

蘇小娘吳七郡王寵姬夏日飛龍宴云炎炎暑氣時

流光閃爍間高深院水閣涼亭半開簾幙遙觀灼灼

榴花吐艷細雨洒小荷香淺樹陰竹影清涼瀟洒枕

簟搖紈扇堪嘆浮世忙如箭對良辰歡樂莫辭頻勸

遇酒逢歌恣情遂意迷戀須信人生難聚奈區區利

縈名絆少年未倦良天皓月金樽滿

蘇小小見第五卷

蘇小小減字木蘭花云別離情緒萬里關山如底數
遣妾傷悲未必即家知不知自從君去數盡殘冬春
又暮音信全乖等到花開不見來

梁意娘

梁意娘寄李生茶瓶兒云滿地落花鋪綉麗色着人
如酒曉鶯窗外啼楊柳愁不柰兩眉頻皺開山杳音
信悄那堪是昔年時候盟言辜負知多少對好景頓
成消瘦

曹希蘊 第十卷有曹緹

曹希蘊燈花踏莎行云鮮遣愁人能添喜氣些兒好
事先施力畫堂深處伴妖嬈絳紗籠裏丹砂赤有艷
難留無根怎覓幾回不忍輕輕剔玉人曾向耳邊言
花有信人無的

魏夫人 見第十卷

魏夫人丞相曾子宣之妻減字木蘭花云西樓明月
掩映梨花千樹雪樹上春歸愁聽孤城一鴈飛玉人
何處又見江南春色暮芳信難尋去後桃花流水深
菩薩蠻云溪山掩映斜陽裏樓臺影動死央起隔岸
兩三家出墻紅杏花綠楊堤下路早晚溪邊去三見
柳綿飛離人猶未歸

繫裙腰云燈花耿耿漏遲遲人別後夜涼時西風瀟
灑夢初回誰念我就單枕皺雙眉錦屏綉幌與秋期
腸歎斷淚偷垂月明還到小窻西我恨你我憶你你
爭知

蟾英

蟾英憶諸葛章花心動云忽覩菱花這一程減却風
流顏色隣姬戲問愧我含羞無語低頭寥寂珠淚紛
紆和粉垂襟袂舊痕乾又濕感起愁懷堆堆積積杜
宇催春急煙籠花柳粉蝶難尋覓紫燕喃喃黃鶯哈
哈對景脂消香泥篆煙將盡愁未休息若得御溝玻
璃碧教紅葉往來傳箇消息

湘江女

湘江一妓女送舒信道中丞行因歌燭影搖紅以侑
觴云綠淨湖光淺寒先到芙蓉島謝池幽夢屬才郎

幾度生春草塵世多情易老更那堪秋風嫋嫋晚來
羞對香芷汀洲枯荷池沼恨鎖橫波遠山淺黛無心
掃湘江人去嘆無依此意從誰表喜趁良宵月皎况
難逢人間兩好莫辭沉醉醉入屏山吳歌天曉

僧兒

僧兒廣漢營妓秀外惠中善填詞戴公兩作漢守寵
之既而得請玉局之司以歸僧兒作滿庭芳贈之云
團菊包金叢蘭減翠畫成秋暮風烟使君歸去千里
倍潸然而度朱旛鴈水全勝得陶侃當年如何見一
時盛事都在送行篇愁煩梳洗懶尋思陪宴花月湖


邊有多少風流往事繁牽聞道霓旌羽駕看看是玉
局神仙應相許冲雲披霧一到洞中天

韓蘭英

蘭英姓韓氏吳郡人齊鬱林王內博士總知內事善
為文章綺密甚有名篇又善談笑號為韓公始入為
後宮司儀有顏氏女夫嗜酒父母奪之入宮為列職
帝以春夜命蘭英為顏氏賦詩曰絲竹猶在御愁人
獨向隅棄置將已矣誰憐微薄軀帝乃還之韓本宋
武帝時見第五卷鮑令暉傳

蘭秋湖

蘭氏號秋湖憶夫詩云去年許我早還家來看茶蘼
架上花花已老時人未到茶蘼何不緩開些
寄衣詩云西風吹葉落庭梧欲剪寒衣遠寄夫一剪
一針腸刺斷不知夫亦斷腸無



古事類聚卷之三

疾夫亦

谷風

